

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
ZASTUPNIČKI DOM

Klub samostalnih zastupnika  
predlagač Zlatko Ercegović

n/r Predsjedavajućeg ZD PFBiH  
gosp. Mirsad Zaimović

Parlament Federacije BiH SARAJEVO			
18-10-2019			
Broj	Priloga	Vrijednost	
01-	02-	2057/19	

Predmet. Prijedlog Zakona o dopuni Krivičnog zakona FBiH

Poštovani predsjedavajući , nakon što je inicijativa da se **„Napad ili ozbiljna prijetnja usmjerena ka zdravstvenim radnicima smatra napadom na službenu osobu pri obavljanju njihove djelatnosti“** usvojena većinom glasova ZD PFBiH 28.02.2019 , na temelju članka 179., a u vezi sa člankom 163 i 172. Poslovnika o radu ZD PFBiH, kao ovlašteni predlagač u ime kluba samostalnih zastupnika , podnosim Zastupničkom Domu :

**Zakon o dopuni Krivičnog Zakona FBiH**


**Predlažemo da se ovaj zakon razmatra u skraćenom postupku.**

**Obrazloženje skraćenog postupka:**

Navedeni prijedlog izmjena Krivičnog zakona FBiH je tekstualno vrlo kratak i ne predstavlja složen i obiman zakonski akt. Riječ je o manjim korekcijama koje su, smatramo, od velike važnosti za korisnike zdravstvene zaštite i zdravstvene radnike kao pružatelje iste u FBiH . Smatramo da su ispunjeni poslovnički uvjeti u skladu sa člankom 172. Poslovnika o radu ZD PFBiH da se ovaj akt razmatra u skraćenom postupku

Predlagač

Zlatko Ercegović



FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
PREDSTAVNIČKI DOM  
KLUB ZASTUPNIKA SDP BIH  
ZASTUPNIK ZLATKO ERCEGOVIĆ

(PRIJEDLOG)

ZAKON  
O DOPUNI KRIVIČNOG ZAKONA FEDERACIJE BOSNE I HERCEGOVINE

Sarajevo, juni/lipanj 2019.godine

ZAKON  
O DOPUNI KRIVIČNOG ZAKONA FEDERACIJE BOSNE I HERCEGOVINE

## Član 1.

U Krivičnom zakonu Federacije Bosne i Hercegovine („Službene novine Federacije BiH“, br. 36/03, 37/03, 21/04, 69/04, 18/05, 42/10, 42/11 i 59/14) u GLAVI XXX – KRIVIČNA DJELA PROTIV JAVNOG REDA I PRAVNOG PROMETA, iza člana 359. dodaje se novi član 359a., koji glasi:

### „Član 359a.

#### **Sprečavanje zdravstvenog radnika u vršenju zdravstvene djelatnosti**

- (1) Ko doktora medicine, doktora dentalne medicine ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječi u obavljanju njegove zdravstvene djelatnosti, kaznit će se kaznom zatvora od tri mjeseca do tri godine.
- (2) Ako je krivičnim djelom iz stava 1. ovoga člana doveden u opasnost život ili tijelo doktora medicine, doktora dentalne medicine ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe, učinitelj će se kazniti kaznom zatvora od šest mjeseci do pet godina.
- (3) Ako je učinitelj krivičnog djela iz stava 1. i 2. ovoga člana bio izazvan protuzakonomitim ili grubim ponašanjem doktora medicine, doktora dentalne medicine ili drugog zdravstvenog radnika može se osloboditi kazne.“

## Član 2.

Ovaj Zakon stupa na snagu osmog dana od dana objavljivanja u „Službenim novinama Federacije BiH“.

### **OBRAZLOŽENJE ZAKONA O DOPUNI KRIVIČNOG ZAKONA FEDERACIJE BOSNE I HERCEGOVINE**

## I. USTAVNI OSNOV

Ustavni osnov za donošenje ovog zakona sadržan je u Poglavlju IV A. 5. 20. (1) d) kojim je propisano da je Parlament Federacije Bosne i Hercegovine nadležan za donošenje zakona o vršenju funkcija federalne vlasti.

## II. RAZLOZI ZA DONOŠENJE

U posljednje vrijeme svjedočimo sve češćim napadima na doktore i druge zdravstvene radnike u Federaciji Bosne i Hercegovine. Doktori i drugi zdravstveni radnici su izloženi raznim vrstama pritisaka, prijetnji, verbalnih pa čak i fizičkih napada od strane nezadovoljnih pacijenata i članova njihovih porodica. Ovim napadima izloženi su doktori i drugi zdravstveni radnici u domovima zdravlja, ambulancama porodične medicine, bolnicama te svim drugim zdravstvenim ustanovama primarnog, sekundarnog i tercijarnog nivoa zdravstvene zaštite, specijaliziranim i drugim zdravstvenim ustanovama. Činjenica je da su zbog prirode njihovog posla koji podrazumijeva zahtjevne uslove i način rada, veliku odgovornost, dežurstva, smjenski i noćni rad, kontakte s bolesnicima, njihovim porodicama i pratnjom, doktori i drugi zdravstveni radnici često izloženi nasilju od trećih osoba kao i od samih pacijenata što šteti psihičkom i fizičkom zdravlju i radnoj efikasnosti doktora, a što ima za posljedicu i ugrožavanje kvalitete i dostupnosti pružanja zdravstvene zaštite građanima ili im čak može direktno ugroziti život, jer napadnuti doktor npr. u hitnoj službi nije u mogućnosti pružiti adekvatnu liječničku pomoć, a time ni zdravstvenu zaštitu.

Unutoč svemu navedenom, postojećim Krivičnim zakonom Federacije Bosne i Hercegovine nije propisana nikakva zaštita doktora i drugih zdravstvenih radnika u Federaciji Bosne i Hercegovine, zbog čega su ovakva protupravna ponašanja postala svakodnevna pojava.

Doktori i zdravstveni radnici su u više navrata izrazili svoje nezadovoljstvo postojećim stanjem te ukazali javnosti na sigurnosne probleme s kojima se susreću u svom poslu. Tokom 2018. godine, a nakon napada na doktoricu u Širokom Brijegu te prijetnje vatrenim oružjem doktoru u Zenici, doktori širom Federacije BiH održali su skupove podrške kolegama koji su bili žrtve takvih napada te su izrazili stav da se pitanje njihove

sigurnosti mora zakonski definisati.

Značaj pružanja zakonske zaštite doktorima i drugim zdravstvenim radnicima u FBiH prepoznao je i Zastupnički dom Parlamenta Federacije BiH u kojem je usvojena inicijativa da se izmijeni zakonska regulativa na način da se napad na zdravstvene radnike tretira kao napad na službenu osobu. Pomenuta inicijativa usvojena je na sjednici Zastupničkog doma Parlamenta FBiH dana 28.02.2019. godine.

Sličan put u ovoj oblasti prošla je i susjedna Republika Hrvatska. Nakon učestalih verbalnih i fizičkih napada na doktore i zdravstvene radnike, a na inicijativu hrvatskih doktora i drugih zdravstvenih radnika, uvedeno je novo krivično djelo „Prisila prema zdravstvenom radniku“, kojim se pruža pravna zaštita doktorima i drugim zdravstvenim radnicima koji zdravstvenu djelatnost obavljaju kao javnu službu u Republici Hrvatskoj. Kažnjava se svaka osoba koja silom ili prijetnjom spriječi doktora medicine, doktora dentalne medicine ili drugog zdravstvenog radnika u obavljanju njegove zdravstvene djelatnosti kao i ako je time doveden u opasnost njegov život ili tijelo ili mu je nanesena teška tjelesna ozljeda ili je upotrijebljeno oružje ili opasno oruđe.

Republika Hrvatska nam može poslužiti kao primjer uspješnog usklađivanja nacionalnog prava s pravom Evropske unije. S obzirom na zajedničku historiju razvoja krivičnog zakonodavstva u Bosni i Hercegovini i Hrvatskoj te zajedničke karakteristike koje i danas postoje u ovoj pravnoj oblasti, smatramo da je propisivanje novog krivičnog djela najprikladnije rješenje za pravnu zaštitu doktora i drugih zdravstvenih radnika i u našoj državi. Propisivanjem krivičnog djela „Sprečavanje zdravstvenog radnika u obavljanju zdravstvene djelatnosti“ osigurala bi se bolja pravna zaštita doktora i drugih zdravstvenih radnika koji obavljaju zdravstvenu djelatnost kao javnu službu te bi se osiguralo adekvatno kažnjavanje učinilaca tog krivičnog djela te preveniralo buduća vršenja istog.

### **III. OBRAZLOŽENJE PRAVNIH RJEŠENJA**

Stavom 1. člana 1. ovog Zakona propisano je da će se kazniti kaznom zatvora od tri mjeseca do tri godine ko doktora medicine, doktora dentalne medicine ili drugog zdravstvenog radnika koji zdravstvenu djelatnost obavlja kao javnu službu silom ili prijetnjom da će izravno upotrijebiti silu spriječi u obavljanju njegove zdravstvene djelatnosti.

Stavom 2. ovog člana propisano je da će se učinitelj kazniti kaznom zatvora od šest mjeseci do pet godina ako je krivičnim djelom iz stava 1. ovog člana doveden u opasnost život ili tijelo doktora medicine, doktora dentalne medicine ili drugog zdravstvenog radnika ili mu je nanesena tjelesna ozljeda ili je upotrijebljeno oružje ili opasno oruđe.

Stav 3. ovog člana propisuje da se učinitelj može osloboditi kazne ako je bio izazvan protuzakornim ili grubim ponašanjem doktora medicine, doktora dentalne medicine ili drugog zdravstvenog radnika.

### **III. FINANSIJSKA SREDSTVA**

Za provođenje ovog Zakona nisu potrebna dodatna finansijska sredstva iz budžeta Federacije Bosne i Hercegovine.